

**ՀԱՅԿԱԿԱՆ ՃԱՐՏԱՐԱՊԵՏՈՒԹՅՈՒՆԸ
ԵՎ ՊԱՏՄԱՆԻԱՐԶԱԳՐԱԿԱՆ ՈՒ ԴԵՄՈԳՐԱՖԻԿ
ԳՈՐԾՈՆՆԵՐԸ***

Մ. Մ. ՀԱՍՐԱԹՅԱՆ

Հայկական լեռնաշխարհն իր դիրքով առանձնահատուկ տեղ է գրավում. այն Արևելքը և Արևմուտքը կապող օղակ է եղել հնում, դրանց տնտեսական և մշակութային կապերն իրականացնող կամուրջ: Այդպիսի դիրքը հայ ժողովրդի պատմության մեջ կարևոր դեր է խաղացել՝ ինչպես դրական, այնպես էլ բացասական: Դրականը սկզբում հելլենիստական, հետո քրիստոնյա աշխարհի բաղկացուցիչ մասը լինելն էր, հաղորդակցվելը Արևմուտքի քաղաքակրթությանը՝ պահպանելով միաժամանակ իր մշակույթում արևելյան արմատները: Այս գործոնները նպաստեցին Հայաստանի հատկապես արվեստի, գրականության, ճարտարապետության զարգացմանը: Ստեղծագործարար յուրացնելով այդ բնագավառներում Արևելքի և Արևմուտքի նվաճումները, հայ ժողովուրդը ստեղծեց իր ինքնատիպ ազգային մշակույթը, իր հերթին հարևաններին փոխանցելով սեփական նվաճումները:

Սակայն Հայաստանի աշխարհագրական դիրքը նաև ճակատագրական դեր է խաղացել հայ ժողովրդի պատմության մեջ: Պետք է նշել, որ աշխարհագրական գործոնը սովետական պատմագրության կողմից անտեսվել է՝ միաժամանակ թերազնահատվելով նաև հայ մշակույթի պատմության մեջ: Իսկ իրականությունն այն է, որ Հայաստանը, գտնվելով Արևմուտքի և Արևելքի հզոր պետությունների միջև, մ.թ.ա. առաջին հազարամյակից մինչև XIX դարը եղել է նրանց էքսպանսիայի օբյեկտ, իսկ անկախության կորստից հետո՝ նաև այդ երկրների միմյանց դեմ մղվող պատերազմների թատերաբեմ: Հայաստանը, այսպես ասած, միշտ գտնվել է «մուրճի և զնդանի» միջև՝ Հին Հռոմի և Պարթևստանի, Բյուզանդիայի և Սասանյան Պարսկաստանի, ավելի ուշ՝ Թուրքիայի և Իրանի և այլն: Այդ պատերազմները կործանարար են եղել երկրի ինչպես տնտեսության, այնպես էլ մշակույթի և հատկապես ճարտարապետության համար: Իր պատմության վերջին երեք հազարամյակների ընթացքում Հայաստանում անկախ պետականություն և համեմատաբար խաղաղ ստեղծագործելու հնարավորություն է եղել նշված ժամանակաշրջանի կեսից էլ պակաս ժամանակահատվածում:

Իսկ եթե նկատի ունենանք, որ անկախ պետականության տարիներին Հայաստանը նաև երկարատև պայքար է մղել տարբեր նվաճողների դեմ գոյությունը պահպանելու համար, ապա խաղաղ կյանքի, շինարարության համար հայ ժողովուրդն ունեցել է ընդամենը մի քանի հարյուրամյակ: Հայաստան են ներխուժել և իրենց տիրապետությունը հաստատել նաև արաբները, սելջուկ-թուրքերը, թաթար-մոնղոլները: Հայ ժողովրդի բազմադարյան պատմության մեջ ողբերգականը և ճակատագրականը եղան թուրքական ցեղերի արշավանքները և տիրապետությունը: Եթե մյուս բոլոր նվաճողների (հռոմեացի կամ բյուզանդացի, պարսիկ թե արաբ)

* Զեկուցումը կարդացվել է 1990 թ. ապրիլի 12—14-ը Սարապուլովում (Ֆրանսիա) կույացած հայկական ճարտարապետական ժառանգության պահպանությանը նվիրված միջազգային դիալոգում:

տիրապետության ժամանակ, այն էլ նույնիսկ երկարատև, Հայաստանի էթնիկ կազմը չխախտվեց, ապա թուրքական քոչվոր ցեղերը Փոքր Ասիա և Կովկաս թափանցելուց հետո դարձան այս ոեզիոնի մնայուն բնակիչ: Հայկական լեռնաշխարհի բնակչությունը, մինչև XII դարը, իր ճնշող մեծամասնությամբ (իսկ գյուղերում՝ ամբողջությամբ) բաղկացած էր հայերից: Մինչդեռ XII—XVII դդ., ալիք առ ալիք Հայաստան ներխուժած թուրքական ցեղերը փոխեցին երկրի դեմոգրաֆիկ վիճակը, գրավելով և հաստատվելով ամենաբարենպաստ վայրերում, պատերազմների հետևանքով դատարկված բնակավայրերում: Ծատ դեպքերում իրենք՝ նվաճողները, հրկիզումներով և թալաններով ստիպում էին հայ բնակչությանը լքել և հեռանալ գյուղերից: Այս է պատճառը, որ Խորհրդային Հայաստանի թուրք-ազերիներով բնակված բոլոր գյուղերում կարելի էր հանդիպել վաղ միջնադարից մինչև XVII դարով թվագրվող եկեղեցիներ և վանքեր: Միաժամանակ օտար նվաճողները, հաստատվելով հայկական բնակավայրերում, փոխում էին բնակավայրերի անունները՝ դրանք թուրքացնելով: Օրբելյանների օրոք Սյունյաց իշխանության կենտրոն Եղեգիսը, որը հարուստ է տասնյակ արժեքավոր ճարտարապետական հուշարձաններով (ղրանց թվում եզակի հորինվածքով Զորաց եկեղեցին) դարձավ Ալայազ, Արատեսը՝ Կղզյուլ, Արտավազավանքը՝ Թաքյաուլ և այլն: Միայն 1938—89 թթ. Խորհրդային Հայաստանի տարածքի հարյուրավոր բնակավայրեր նորից դարձան հայաբնակ և այժմ մնում է վերականգնել նրանց պատմական անունները:

Միջնադարում հայ ազգաբնակչության՝ իր պատմական բնակավայրերից զանգվածային տեղահանման ցայտուն օրինակ է Սիֆյան Իրանի տիրակալ Շահ-Աբասի կողմից 1604 թ. Արևելյան Հայաստանից դեպի Իրանի խորքերը 300 000 հայերի բռնի տեղափոխելը: Տեղահան արվեցին Արարատյան նահանգի, Նախիջևանի, Գողթան, Երնջակ գավառների բնակչությունը, իսպառ դատարկվեց 20 հազար բնակիչ ունեցող Զուղա քաղաքը, որը եռանդուն առևտրական կապերի մեջ էր Եվրոպայի և Ասիայի երկրների հետ: Հայկական բնակավայրերը ամայացան, որից և օգտվելով, այնտեղ բնակություն հաստատեց թուրքական և քրդական տարրը:

Սակայն պատմական Հայաստանը հայ բնակչությունից զրկելու և նրան ֆիզիկապես ոչնչացնելու պետականորեն ծրագրված ակտը իրականացվեց 1915թ., երբ տեղի ունեցավ XX դարի առաջին ցեղասպանությունը: Թուրքիայի տարածքում բնաջնջվեց 1,5 միլիոն հայ, իսկ մնացածը արտագաղթեց Անդրկովկաս և Ռուսաստան, Մերձավոր Արևելք, Եվրոպա և Ամերիկա:

Հայ ճարտարապետության պատմությունը սերտորեն կապված է Հայաստանի պատմության հետ: Այն բոլոր արհավիրքները, որոնք կրել է հայ ժողովուրդը, անմիջականորեն անդրադարձել են հայ ճարտարապետության զարգացման ընթացքի վրա: Պետականության կորուստը, թշնամիների ներխուժումը, երկրի մասնատումը տարբեր պետությունների կողմից, բնակչության տեղահանումը իրենց կնիքն են թողել հայ ճարտարապետության վրա:

Վաղ միջնադարից սկսած, երբ ձևավորվեց հայկական ազգային ճարտարապետությունը, մինչև XIX դարը նրա պատմությունը բաժանվում է երեք շրջանի, և այդ բաժանումը պայմանավորվում է երկրի պատմությամբ: Առաջին շրջանը՝ IV—VII դդ., հայ ճարտարապետության դասական շրջանն էր, երբ ձևավորվեց նրա ազգային ոճը, ինչպես ասում են՝ «ազգային դեմք», ստեղծվեցին այն բոլոր ճարտարապետական տիպերը, որոնք կիրառվեցին հետագայում ինչպես Հայաստանում, այնպես էլ նրա սահմաններից դուրս:

Այս շրջանն սկսվում է IV դարից, երբ Հայաստանն աշխարհում առաջինը հույս պետական կրոն ընդունեց քրիստոնեությունը, և ավարտվում է VII դարի վերջով, երբ երկրում հաստատվեց արաբական տիրապետությունը: Այս շրջանի դարերի ընթացքում ձևավորվեց ինքնատիպ հայկական ճարտարապետ-

տությունը, որը հենվում էր ուրարտական և հելլենիստական շինարարական արվեստի ավանդների վրա: Հայաստանի և Ասորիքի կրոնական սերտ կապերը, որոնց նպաստում էր այդ երկրների հարևանությունը, զուգակցվեցին տառարկան ճարտարապետության որոշ հորինվածքային և դեկորատիվ ձևերի ազդեցությամբ, որը տեղեց մինչև V դարի վերջը: Ինքնուրույն, ազգային կրոնական ճարտարապետության ձևավորմանը Հայաստանում նրապատեց հայ եկեղեցու անկախությունը. այն ավտոկեֆալ դարձավ 372 թ., իսկ 506 թ. Դվինի ժողովում մերժեց Քաղկեդոնի ժողովի դավանանքը, որը հանդիսանում էր Բյուզանդիայի և նրա եկեղեցու հետ կապերի խզմանը: Սա դրական մեծ ազդեցություն ունեցավ հայ ճարտարապետության զարգացման վրա: VI—VII դդ. այն մի իսկական թուրք ունեցավ, որն այդ ժամանակաշրջանում քրիստոնեական աշխարհի այլ երկրներում չի հանդիպում: Վաղ միջնադարում հայ ճարտարապետությունը եկեղեցական շենքերի տիպարանությամբ և դեկորով մոտ է միայն հարևան Վրաստանի շինարարական արվեստին, որը բացատրվում է սերտ քաղաքական և կրոնական կապերով, ճարտարապետների անմիջական ստեղծագործական շփումներով, բնական նման պայմաններով ու շինանյութերով և այլն:

VI—VII դդ. հայ ճարտարապետությունը մշակեց մի շարք շենքերի տիպեր, որոնք եղան նրա ավանդը վաղ քրիստոնեական արվեստում: Դրանք են՝ «յմբեթավոր դահլիճը», կողային էքսեդրաներով դմբեթավոր բազիլիկան, ներդրված խաչը չորս մույթերով և, առաջին հերթին, կենտրոնական կառուցվածքների մի ամբողջ ինքնատիպ շարք. տետրակոնիս անկյունային խորշերով, տետրակոնիս քառակուսու վրա (Մաստարայի տիպը), տետրակոնիս քառակուսու վրա չորս գմբեթակիր մույթերով (էքմիաժին—Բագարանի տիպը), որը տարածվեց երկրի սահմաններից դուրս: Իսկ այն դեպքում, երբ կիրառվում էր արդեն հայտնի սխեմա, ապա Հայաստանում այն մեկնաբանում էին յուրովի, զարգացնելով և մշակելով (ինչպես, օրինակ, Զվարթնոցի տաճարը):

Արաբական լուծր ծանր հետևանքներ ունեցավ Հայաստանի ոչ միայն տնտեսության, այլև մշակույթի վրա: Երկու դար շարունակ երկրում կանգ առավ շինարարական կյանքը, չկառուցվեց ոչ մի մոնումենտալ շենք, եղածների մի մասն ավերվեց: Այդ է պատճառը, որ ազգային ճարտարապետության պատմության երկրորդ շրջանը սկսվում է ոչ թե VIII դարից, այլ IX դարի վերջից և տևում մինչև XIV դարը:

885 թ. Հայաստանն անկախություն ձեռք բերեց, և Աշոտ Բագրատունին դարձավ թագավոր: Երկրի մայրաքաղաքները հաջորդաբար եղան Բագարանը, Շիրակավանը, Կարսը և 961 թ.՝ Անին: Բայց երկրի տնտեսական և քաղաքական մասնատվածությունը և խոշոր ֆեոդալների առաջատուական ձգտումները խանգարեցին ողջ երկիրը միասնական պետության մեջ միավորելուն և X դարում Հայաստանում ստեղծվեցին մի քանի վասալ թագավորություններ՝ Վասպուրականում, Վանանդում, Սյունիքում, Լոռիում: Երկրի այս մասնատվածությունը իր հերթին հանգեցրեց առանձին ճարտարապետական դպրոցների ստեղծմանը: Մեծ դեր խաղաց Անիի դպրոցը, որը X դարից սկսած դարձավ առաջատար, և մայրաքաղաքում մշակված ոճական ուղղությունը տարածվեց երկրի բոլոր նահանգներում: Անիի դպրոցի նվաճումները կապված են միջնադարյան Հայաստանի խոշորագույն ճարտարապետ Տրդատի հետ: Իր նշանակությամբ հաջորդ դպրոցը Սյունիքին էր, որտեղ ճարտարապետական դարձրեց տեղի ունեցավ մյուսներից ավելի վաղ, և այդտեղ եկեղեցական շենքերի հետաքրքրական տիպեր մշակվեցին: Վասպուրականի ճարտարապետության ցուրտգործուր հանդիսացավ Մուսունկ ճարտարապետի կերտած Աղթամարի Ս. Խաչ եկեղեցին (X դար), որը հակառակորդ քանդակների հաղեցվածությամբ և աշխարհիկ թեմատիկայի դերակշռությամբ և լուսկի է միջնադարյան Հայաստանի արվեստում: Լոռու ճարտարապետական դպրոցը աչքի է ընկնում վանական համալիրների առա-

տություններ, աշխարհիկ շենքերի բազմազանությունը (ակադեմիա, դպրոց, գրադարան և գրչատուն, սեղանատուն, արտագրական շենքեր և այլն): XIII դարում ճարտարապետական դպրոց ձևավորվեց նաև Արցախում, որտեղ հզորացավ խաչների հայկական իշխանությունը: Արցախի դպրոցի գլուխ-գործոցները հիմնականում կենտրոնացված են վանական համալիրներում. այդ շարքում առանձնանում է Գանձասարը, որը իրավամբ կոչվում է «XIII դարի հայկական ճարտարապետության հանրագիտարան»:

X—XI դդ. Հայաստանում ձևավորվեց կառույցի մի նոր տիպ՝ զավիթը կամ ժամատունը, որը կցվում էր եկեղեցիներին հիմնականում արևմուտքից: Նրանց առաջացումը պայմանավորված էր հայ եկեղեցու այն կանոնով, որով արգելվում էր եկեղեցական շենքի ներսում թաղումներ կատարել: Գավիթները դամբարանի դեր էին խաղում, միաժամանակ հավատացյալների համար լրացուցիչ տեղ, ինչպես նաև ժողովատեղ էին ծառայում:

Հայաստանի աշխարհագրական դիրքը՝ Արևելքը և Արևմուտքը, Հյուսիսը և Հարավը կապող առևտրական տարանցիկ ճանապարհների վրա որպես մի խաչմերուկ, ինչպես նաև հայ վաճառականների աշխույժ առևտուրը միջնադարում հարևան և հեռավոր երկրների հետ, կարավանատների և կամուրջների բուռն շինարարության խթան հանդիսացան: Իրենց ճարտարապետությունները առանձնանում են Արուճի, Ջորի, Թալինի, Սուլեմայի քարավանատները, Արաքսի, Ախուրյանի, Դեբեգի վրա կառուցված կամուրջները: X—XI դդ. իր զարգացումն ունեցավ ֆորտիֆիկացիոն արվեստը՝ Շիրակում, Սյունիքում, հետագայում հայկական Կիլիկիայում: Դա շինարարական արվեստի այն բնագավառն է, որի համար անհրաժեշտ ու պարտադիր պայման էր երկրի անկախությունը:

Հայ ճարտարապետության պատմության երկրորդ շրջանը ավարտվում է XIV դարում, երբ ընկավ Կիլիկիայի հայկական թագավորությունը, իսկ բուն Հայաստանը ենթարկվեց Լենկթեմուրի կործանարար արշավանքներին: XIV դարում վերացան և պատմության ասպարեզից դուրս հեռան հայկական վերջին կիսանկախ իշխանությունները: Օրբելյանների իշխանության վերացումով վերջ դրվեց նաև Վայոց ձորի քանդակագործական դպրոցին, որի լավագույն ստեղծագործությունները կապված էին այն ժամանակույն շրջանի հայ խոշոր ստեղծագործողի՝ քանդակագործ, նկարիչ և ճարտարապետ Մոմիկի անվան հետ:

XIV դարից հետո հայկական ճարտարապետության պատմության մեջ ընդմիջումը տևեց ամբողջ երեք դար՝ մինչև XVII դարը: XV դարում Հայաստանը դարձել էր աղ-կոյունլու և կարա-կոյունլու թուրքմենական ցեղերի միմյանց դեմ մղվող անընդհատ կռիվների, իսկ XVI դարում՝ Օսմանյան Թուրքիայի և Իրանի միջև մղվող պատերազմների թատերաբեմ: Նորից երկրի աշխարհագրական դիրքը՝ արևելյան երկու բռնապետությունների միջև, ճակատագրական եղավ նրա թե՛ տնտեսության, թե՛ մշակույթի համար: Մեծապես վնասվեցին արվեստի ու ճարտարապետության կոթողները, ավերվեցին եկեղեցիները և վանքերը: Միայն XVII դարում, երբ 1612 թ. Թուրքիան և Իրանը հաշտություն կնքեցին, համեմատաբար նպաստավոր պայմաններ ստեղծվեցին տնտեսության վերելքի, շինարարական աշխատանքների վերականգնման համար: Հայ ճարտարապետության պատմության երրորդ շրջանը՝ XVII—XVIII դդ., իր նվաճումներով չի կարող համեմատվել նախորդ շրջանների հետ: Հայ ժողովուրդը կարճատև ժամանակ ունեցավ՝ ավերված վերականգնելու և նոր կառուցումներ անելու համար: Սակայն երկարատև ընդմիջման հետևանքով կորսվել էին շինարարական շատ ավանդներ, որը և բացասաբար ազդեց այդ ժամանակաշրջանի հայ ճարտարապետության ընդհանուր մակարդակի վրա:

Այդ իսկ պատճառով եկեղեցիների մասսայական շինությունների համար օգտագործվեցին պարզ ճորինվածքներ՝ միանավ և եռանավ բազիլիկայաներ: Նախիջևնի տարածքում՝ Հայաստանի պատմական Գողթան և Երբն-

ջակ ղավստոններում XVII դարում՝ ձեւավորվեց հայ ճարտարապետության ինքնատիպ դպրոց, որի առանձնահատկություններից են գմբեթավոր բազիլիկայի հորինվածքի լայն կիրառումը, գմբեթներն աշյուսից, իսկ շենքի հիմնական ծավալը քարից կառուցելը, ներսից բազմախոտ աբսիդի իրականացումը և այլն: Նրկրի անկախության կորուստը XVII դարի ճարտարապետության վրա ունեցավ նաև մի ուշագրավ հետևանք՝ պետականության բացակայության դեպքում, երբ հայերը բերդեր կառուցելու հնարավորություն և իրավունք չունեին, վերջիններին փոխարինեցին վանքերը, որոնք ստեղծվում էին երկու տարբեր ճարտարապետական օրգանիզմների՝ կրոնական և պաշտպանական կառուցվածքների յուրօրինակ սինթեզով:

Հայ ժողովրդի ուշ միջնադարի պատմության ողբերգական բնույթն է պատճառը, որ մասնատված լինելով և կրելով Արևելքի երկու հետամնաց բռնապետությունների՝ Ռուսթիայի և Իրանի լուծը, հայ ճարտարապետության պատմության մեջ միջնադարյան շրջանը շարունակվեց մինչև XVIII դարը ներառյալ: Եվ այդ այն դեպքում, երբ IV դարից մինչև XIV դարը հայ ճարտարապետությունը քրիստոնեական աշխարհում աչքի էր ընկնում իր զարդայման լարծր մակարդակով, ինքնատիպությամբ ու նորարարական լուծումներով: Իսկ այնուհետև մոտ կես հազարամյակ հայկական շինարարական արվեստը սնկում ապրեց և միայն XIX դարի սկզբում Արևելյան Հայաստանը Ռուսաստանին միանալուց հետո հնարավորություն ստեղծվեց հաղորդակից լինելու նոր դարաշրջանի առաջադեմ քաղաքաշինությանը և ճարտարապետությանը: XIX դարից սկսած հայ ճարտարապետությունը զարգացավ արդեն միայն Կովկասյան ռեգիոնի տարածքում (Արևելյան Հայաստան, Թբիլիսի, Բաքու, Հյուսիսային Կովկաս) և դարձավ համաօրինակության մշակույթի բաղկացուցիչ կարևոր մասը:

XIX դարի երկրորդ կեսից հայկական առևտրական և արդյունաբերական կապիտալը կենտրոնացված էր հիմնականում Թբիլիսի և Բաքու քաղաքներում: Իրա հետևանքով հայ հարուստները մեծ ներդրումներ կատարեցին այդ երկու քաղաքների տնտեսության, արդյունաբերության զարգացման, քաղաքաշինության մեջ: Բաքու և Թբիլիսի քաղաքներում XIX—XX դդ. աշխատում էին մի շարք հայ ճարտարապետներ, որոնց նախագծերով այդտեղ կառուցվեցին բազմաթիվ բնակելի և հասարակական շենքեր: Նրանցից միայն մեկի՝ Դաբրիել Տեր-Միքելյանի գործունեությունն արդեն ակնառու ցույց է ապրիս հայ համայնքի մեծ ներդրումը Կովկասի այդ երկու խոշորագույն քաղաքների կառուցապատման գործում: Այսպես, օրինակ, XIX դարի վերջում և XX դարի սկզբում նրա նախագծերով են կառուցվել Բաքվում՝ ծննդատան, առևտրական բանկի, համերգային դահլիճի շենքերը, բնակելի տներ, բանվորական ավան, Թբիլիսիում՝ «Մաժնստիկ» հյուրանոցը, արդյունաբերական ցուցահանդեսի տաղավարը, բնակելի, եկամտաբեր տներ և այլն:

Հայ ժողովրդի պատմության առանձնահատկություններից մեկը, որի հետ սերտորեն կապված է ճարտարապետության պատմությունը, վաղ միջնադարից սկսված մասսայական արտագաղթերն են և Եվրոպայի, Աֆրիկայի, Ասիայի տարբեր երկրներում հայկական գաղութների ստեղծումը: Խոշոր արտագաղթեր տեղի ունեցան Անիի թագավորության անկումից (XI դար) և Կիլիկյան հայկական պետության վերացումից (XIV դար) հետո, ապա՝ սելջուկ-թուրքերի, թաթար-մոնղոլների ասպատակությունների և ավերածությունների հետևանքով: Հայերը տեղափոխվում էին ինչպես սահմանակից երկրներ (Վրաստան, Իրան), այնպես էլ Ռուսաստան, Դրիմ, Լեհաստան, Բալկանյան թերակղզի, Արևմտյան Եվրոպա, Հնդկաստան և այլն: Այդ գաղթօջախներում հայերը պահպանում էին իրենց կրոնը, լեզուն, կենցաղը և սովորությունները, որոշ տեղերում նույնիսկ ունեին ինքնավարություն և սեփական դատարան:

XI—XII դդ. Անիից մեծ քանակությամբ հայ բնակչությունը գաղթեց Վրաստան՝ Թբիլիսի, ապա Գորի և նրա շրջակայքը։ Արդեն վրաց Ռամար խաչուհու օրոք (XIII դար) հայերը Վրաստանում, հատկապես նրա մայրաքաղաք Թբիլիսիում աչքի ընկնող դեր էին խաղում։ 1251 թ. հայ իշխան Սևակը Թբիլիսիում կառուցում է Կաթողիկե եկեղեցին։ Նույն XIII դարում կառուցվեցին Սուրբ Գևորգ եկեղեցին և հայկական Հարանց վանքի տաճարը (երկուսն էլ վերակառուցվեցին XVIII դարում)։ XIX դարում Թբիլիսիում կար 24 հայկական եկեղեցի, որոնց մեծ մասը գոյություն ունի մինչև հիմա։

XIV դարի սկզբում հայկական խոշոր համայնք կազմավորվեց Վրաստանում՝ XV դարում ստեղծված կախեթական թագավորության մայրաքաղաք Գրեթիում։ Հայ գաղութը թագավորական դղյակից հարավ-արևմուտք ձգվող մեծ թաղամաս էր զբաղեցնում (մոտ 30 հա)։ Այստեղ կարճ ժամանակամիջոցում կառուցվեցին տասը եկեղեցի, շուկա, իջևանատուն։ Աչքի է ընկնում եռահարկ գմբեթավոր սուրբ Աստվածածին եկեղեցին, որը 1595 թ. կառուցել էր Մկրտիչը (հայերեն արձանագրությունը կրկնված էր թագավորության պաշտոնական լեզուներով ևս՝ վրացերեն և պարսկերեն)։

Անանուր ամրոցում, որը գտնվում է Ռադմավիրական ճանապարհի վրա, 1688 թ. հայ ճարտարապետները և վարպետները կառուցեցին Մեծ եկեղեցին։ Կառուցման թվականը հայերեն փորագրված է շենքի արևելյան ճակատին, իսկ ճարտարապետի անունը՝ «Գրիգոր», հարավային։ Քվախվրևի ժայռափոր հայկական վանքը գտնվում է Քուռ գետի աջ ափին, Գորիի մոտ։ Դեպի վանքի Սուրբ Խաչ եկեղեցին տանող միջանցքի պատերին, ինչպես և Գեղարդի վանքում, խաչքարեր են փորագրված XVI—XVII դդ. հայերեն արձանագրություններով։ Վրաստանի հարավ-արևմտյան հայաբնակ շրջանների (Ախալքալակ, Ախալցխա, Բոգղանովկա) եկեղեցիները հիմնականում կառուցված են XIX դարում։ Նրանց շարքում իր ճարտարապետությամբ առանձնանում է Ախալցխայի Սուրբ Վարդան եկեղեցին, որն իր բարձրագույն տեղագրությամբ գերիշխում է ողջ քաղաքի համայնապատկերում։

Հարավային Օսեթիայի մայրաքաղաք Յխինվալիում XVII դարից ղույություն ունեւ հայկական մեծ համայնք։ Քաղաքի կենտրոնում կանգուն է Ս. Աստվածածին հայկական գմբեթավոր եկեղեցին (1718 թ.), որից հարավ գտնվում է երբեմնի հայկական թաղամասը։

Աշխարհագրական առումով Մայր Հայաստանին մոտ գտնվող հայկական գաղթօջախների՝ Վրաստանի, Իրանի, Հյուսիսային Կովկասի, նաև Ղրիմի եկեղեցիները և մոնումենտալ աշխարհիկ շենքերը հորինվածքային և ոճական միասնություն ունեն ազգային ճարտարապետության նմանատիպ կառույցների հետ։ Դա բացատրվում է այդ գաղթօջախների և Հայաստանի սերտ կապերով, որին նպաստում էր նրանց մոտիկությունը։ Իսկ ավելի հեռու երկրների գաղթօջախների ճարտարապետությունն արդեն կրում էր յուրաքանչյուր այդ երկրի շինարարական արվեստի զգալի ազդեցությունը։ Դա վերաբերում է Ռուսաստանի, Բալկանների, Լեհաստանի, Ռումինիայի և Մոլդավիայի, ինչպես նաև Իրանի հայկական գաղութների ճարտարապետությանը։ Տարբեր արվեստների այս սինթեզը մի շարք դեպքերում ստեղծել է ինքնատիպ ճարտարապետական ոճով ստեղծագործություններ։ Օրինակ, Նոր Զուղայի (Իսպահան) հայկական եկեղեցիների շենքերը զուգակցում են ավանդական հորինվածքները իսլամական արվեստին բնորոշ դեկորի և որոշ ձևերի հետ։ Քրիստոնեական և իսլամական ճարտարապետության այսպիսի սինթեզը, ընդ որում եկեղեցական շենքում, Նոր Զուղայի հուշարձանները դարձնում է եզակի ողջ Արևելքի ժողովուրդների արվեստում։

Հայերը սկսել են բնակություն հաստատել Հյուսիսային Կովկասում XII դարից սկսած։ Այս աշխարհագրական տարածքը ընդգրկում է Ռուսաստանի Ֆեդերացիայի կազմի մեջ մտնող Կրասնոդարի և Ստավրոպոլի երկրամասերը, Կարադաղի—Բալկարական, Հյուսիս—Օսական, Զեչենս—Ինգուշական և

Դադարանի Ինքնավար հանրապետութիւնները: Հյուսիսային Կովկասում հայ համայնքի Կոյուքյան հնագոյն փաստը ծագումով դրիմեցի՝ Քլաֆացի (այժմյան Ռեպուսիտ) ճարտարապետ Խրիստապետի կառուցած եկեղեցին է (շինարարական աշխատանքները քարը այժմ պահպանում է Վրաստանի տնտեսութեան թանկարանում): Պատահական չէ ճարտարապետի՝ ծագումով Գրիմից լինելը, որովհետեւ Հյուսիսային Կովկաս հայերը, սկսած XII դարից, թափանցել են Գրիմից: Իսկ Գրիմ հայերը գաղթել են XI դարում, հիմնականում Անիից, Բագրատունյաց թագավորութեան անկումից հետո: Միջնադարում թերակղզում կար արդեն մոտ 300 000 հայ բնակչութիւն՝ իր տասնյակ եկեղեցիներով ու վանքերով, կրթական օջախներով: Հայերի արտադաշնային Գրիմից սկսվեց XV դարում, երբ այս թերակղզի ներխուժած Օսմանյան Թուրքիան հաստատեց այնտեղ իր տիրապետութիւնը, և իր գաղթեցողութիւնը հասավ XVII դարում, երբ զանգվածաբար տեղափոխվելով Դուրի դեղատեղանի (միկ անգամից գաղթեց 12600 մարդ), այնտեղ 1779 թ. հիմնեցին՝ նոր նախիջեան քաղաքը, կանոնավոր հատակագծով, երկհարկանի բնակիչի և հասարակական շէնքերով, վեց եկեղեցիով և Սուրբ Խաչ վանքով:

Հյուսիսային Կովկաս, Գրիմից բացի, հայերը գաղթեցին նաև Արևելյան Հայաստանի (հիմնականում XVIII դարում): Պարսկաստանի և Ռուսաստանի միջև կատարվող առևտրի մենաշնորհը այդ ժամանակաշրջանում դառնում էր հայերի ձեռքին և առևտրական ճանապարհի վրա գտնվող խոշոր քաղաքներում (Երեբունի, Ղզլար, Աստրախան և այլն) հայկական մեծ և հարուստ համայնքներ ստեղծվեցին:

Հայ միոհոնները Դադարանում քարոզել են գեո վաղ միջնադարից: Հայերի քաղաքական և շինարարական գործունեության վկաններն են Դադարանի տարածքում (հին Բելենջերում) պեղումներով բացված հնագոյն եկեղեցիները, որոնք իրենց ճարտարապետությամբ և քանդակներով առնչվում են վաղ միջնադարյան հայկական արվեստին, ինչպես նաև լեռներում դառնում խաչքարների նմուշները: Պատահական չէ, որ Դադարանի ժայռավոր գոյնը խաչը անվանում են «խանչ», այդ բառը և խաչի հասկացողութիւնը փոխ առնելով հայերից, Դադարանում հայկական տարրը զանգվածաբար շատացավ XVIII դարում, երբ այս երկրամասը միացվեց Ռուսաստանին: Հայերն այստեղ գաղթեցին Արցախից (Ղարաբաղից) և Շամախի քաղաքից: XIX դարում կառուցվեցին հայկական Ս. Աստվածածին եկեղեցին՝ հին Դերբենդի կենտրոնում, նրա շուրջը երկհարկանի բնակելի շէնքերով հայկական թաղամաս, դպրոց և գրադարան: Հայկական ճարտարապետութեանը բնորոշ լուծումներով եկեղեցին իր խոշոր ծավալով, բարձր դմբերով Դերբենդի միջնադարյան մասի ուղղածից շէնքն է, կառուցապատման ուղղագծի կարևոր տարրը: Ղզլարը հիմնվեց ռուսների կողմից 1735 թ., որից անմիջապես հետո այնտեղ հաստատվեցին հայերը: XIX դարում քաղաքի բնակչության երկու երրորդը հայեր էին՝ իրենց եկեղեցիներով (չեն պահպանվել), առանձին դատարանով, արական և իգական դպրոցներով:

Հյուսիսային Օսիա հայերը գաղթել են XVIII դարում: Նրանք հիմնականում հաստատվեցին Մոզդոկ և Վլադիկավկազ քաղաքներում: Մոզդոկում XIX դարում կային երեք՝ խաչած զմբեթավոր հորինվածքով Ս. Ստեփանոս (քանդել են 1930-ական թթ.), գերեզմանոցային Ս. Գևորգ և եռադմբե փայտաշեն Համբարձման հայկական եկեղեցի: Իսկ Վլադիկավկազի Լճատրոնում կանգուն է խոշոր զմբեթավոր բազիլիկի հորինվածքով աղյուսաշեն Ս. Գրիգոր եկեղեցին, որը մինչև օրս էլ գործում է որպես հայկական եկեղեցի:

Հյուսիսային Կովկասում հայերը ոչ միայն գոյութիւն ունեցող բնակավայրերում էին հաստատվում, այլև նույնիսկ նոր քաղաք հիմնադրեցին: Դեռևս XVIII դարում շերքեզների լեռնային առկներում բնակութիւն հաստատած հայերը 1839 թ. տեղափոխվեցին հարթավայր և հիմնեցին Արմա-

վիր քաղաքը, որը կոչեցին հին Հայաստանի մայրաքաղաքի անունով: XIX դարի երկրորդ կեսում, մտնավանդ երկաթուղու անցկացումից հետո, Արմավիրը բուռն զարգացում ապրեց, հայկական բնակչությունը զգալիորեն աճեց Կոստանդնուպոլսից, Տրապիզոնից, Սինոպից գաղթողների հաշվին: Քաղաքի բնակելի և հասարակական շենքերը կառուցվում էին ռուսական «կլասիցիզմի» ոճով, իսկ եկեղեցիները (Համբարձման, Ս. Գևորգ և գերեզմանոցային) զուգակցում էին հայկական շինարարական արվեստի ավանդական և ռուսական ճարտարապետության ձևերը:

Ես դիտարկեցի հայկական ճարտարապետության պատմության մեջ դեմոգրաֆիկ գործոնի միայն մի կողմը՝ կապված հայերի արտագաղթի, հայկական գաղթօջախների ստեղծման հետ (ընդ որում միայն Կովկասի տարածքում): Միաժամանակ կա դեմոգրաֆիկ գործոնի մյուս կողմը՝ կապված տարբեր ժամանակներում Հայաստանում հաստատված այլ ազգերի շինարարական գործունեության հետ: Հայաստանը նվաճած ժողովուրդներից առաջինը արարեցին էին, որ փոքրաթիվ քանակով և այն էլ պատմական համեմատաբար կարճ ժամանակ հաստատվեցին հայկական քաղաքներում: Սակայն արարական տիրապետությունը չզուգակցվեց շինարարական գործունեությանը, և հայ ճարտարապետության զարգացման ընթացքի վրա արարները ոչ մի ազդեցություն չունեցան, իսկ այն կարծիքը, թե պայտածե կամարը հայերին է անցել արարներից, անհիմն է, որովհետև այդպիսի կամարի օրինակներ Հայաստանում ունենք IV դարից սկսած: Օրինակ, պայտածե կամարով որոշակի թվագրված հուշարձաններից են Աշցի Արշակունյաց թագավորների դամբարանը (364 թ.), Տեկորի տաճարը (478—490 թթ.) և այլն:

Հաջորդ՝ սելջուկյան տիրապետությունը արդեն զուգակցվեց փոխազդեցությունների երևույթով: Սկզբնական շրջանում շինարարական ավանդներ չունեցող սելջուկները, զրավելով Հայաստանն ու Կովկասը, լայնորեն օգտագործում էին տեղի ճարտարապետներին և շինարար վարպետներին: Այսպես, օրինակ, XIII դարում, ճարտարապետ Կալոյանը Սերաստիայում կառուցեց Գեյուկ մեդրեսեն, Ստեփանի որդի Թագավորը Մալաթիայում՝ սելջուկյան լավագույն մեդրեսեներից մեկը, իսկ Գալուստը՝ Տիվրիկի մզկիթը և Իկոնիայի մեդրեսեն: Հայ վարպետների կառուցած սելջուկյան դամբարանները աչքի են ընկնում հայկական ազգային ճարտարապետական ձևերի և դեկորի •գտագործումով, օրինակ՝ եկեղեցիների կամարաճարով զարդարված բազմանիստ թմբակով: Սրածայր վեղարով գմբեթի հորինվածքը կիրառվեց Ախլաթի, Ոստանի, Կաբինի (էրզրումի) շրջակայքի XIV դարի «թյուրքներում» և այլն:

Իր հերթին XIII—XIV դդ. հայկական ճարտարապետության մեջ կիրառվեցին որոշ զարգամոտիվներ, որոնք պայմանավորված էին սելջուկյան տիրապետությամբ՝ դա ստալակտիտներն էին և այսպես կոչված «սելջուկյան շղթան»: Պատմական Հայաստանի կովկասյան մասի տարածքում սելջուկների կառուցած մոնումենտալ շենքերը խիստ սակավաթիվ են (հիմնականում XII—XIII դդ. դամբարաններ, Նախիջևանի Իձ-ի տարածքում):

Ուշ միջնադարում, երբ Արևելյան Հայաստանը գտնվում էր Սեֆյան Իրանի տիրապետության ներքո, հայ ճարտարապետության մեջ պարզորոշ

նկատվում է պարսկական դեկորատիվ արվեստի որոշ տարրերի ընդօրինակում, որոնք օգտագործվեցին ինչպես աշխարհիկ շենքերի, այնպես էլ եկեղեցիների արտաքին ճակատների և ինտերյերների ձևավորման համար: Պարսկական ճարտարապետության ազդեցությամբ պետք է բացատրել նաև XVII—XVIII դդ. Հայաստանում, հատկապես Նախիջևանում և Զանգեզուրում, ազյուսի կիրառումը: Այս երկու գործոնները՝ իրանի տիրապետությունը և ազյուսի լայն օգտագործումը, հանգեցրին ոչ միայն պարսկական արվեստին բնորոշ դեկորատիվ տարրերի, այլև պարսկական ճարտարապետությանը հատուկ կոնստրուկցիաների՝ սլաքաձև կամարի, ազյուսի թաղի կիրառմանը Արևելյան Հայաստանում: Վերջինիս վարչական կենտրոն Երևանում XVIII դարում պարսիկները մի շարք մզկիթներ կառուցեցին, որոնցից լավ պահպանվածը և իր ճարտարապետությամբ Կովկասում լավագույնը Գյոյ-մզկիթն է:

Ինչ վերաբերում է Անդրկովկասի պատմական հայկական տարածքում բնակություն հաստատած թուրքական տարրին, ապա նրանք մոտենում են տալ ճարտարապետության բնագավառում ունեն միայն սակավաթիվ քանակով մզկիթների (XVIII—XIX դդ.) կառուցման օրինակներ (Նախիջևան, Օրդուրտո, Շուշի): Այդ տարի առկայությունը սկզբում բացասական, իսկ ավելի ուշ ողբերգական եղավ նշված վայրերի հայկական ճարտարապետական հուշարձանների դուրսն առնելու համար:

Դիտարկենք հայկական ճարտարապետական ժառանգության պահպանման մի ուրիշ հարց ևս, կապված գաղափարական հեղաշրջումների հետ: Դրանցից առաջինը և էականը կատարվեց IV դարի սկզբում, երբ Հայաստանը ընդունեց քրիստոնեությունը: Հստ պատմիչների տեղեկությունների, նոր կրոնի տարածումը զուգակցվեց հեթանոսական տաճարների, մոտենում են տալ արվեստի բոլոր հուշարձանների (բացառությամբ Դառնիի) անխափր ոչնչացումով: Փաստորեն հայ ժողովուրդը մեկ հարվածով զրկվեց իր հաղարտյա մշակույթից: Հայկական ճարտարապետական ժառանգությունը մեծ վնաս կրեց նաև 1930-ական թթ. Խորհրդային Միությունում կատարված այսպես կոչված «կուլտուրական ռևոլյուցիայի» հետևանքով: Փակվեցին գործող համարյա բոլոր վանքերն ու եկեղեցիները, նրանց մի զգալի մասը քանդվեց: Եկեղեցիների քանդումը, հիմնականում քաղաքներում, մեծ չափերով կատարվեց առաջին հերթին Ռուսաստանում, ինչպես նաև Կովկասում: Դա «հիմնավորվում» էր քաղաքների զարգացման, նրանց կառուցապատման պահանջներով, քաղաքաշինական վերակառուցմամբ, նոր մայրուղիների ու հրապարակների ստեղծմամբ: Երևանում քանդվեցին Պողոս—Պետրոս բազիլիկան (XVII դար), և քաղաքի ամենախոշոր Ս. Գրիգոր Լուսավորիչ եկեղեցին (XIX դար): Քանդվեցին նաև Հյուսիսային Կովկասի, Ադրբեջանի, Վրաստանի հայկական շատ եկեղեցիներ: Պետք է նշել, որ, օրինակ, Թբիլիսիում քանդվեցին միայն հայկական եկեղեցիները (թվով 10), որոնց շարքում XIV դարում հիմնադրված հայկական վանքի համալիրը Եռագմբեթ բազիլիկ խաչքար տաճարով, Ս. Հովհաննես Մկրտիչ, Ս. Սարգիս, Ջիգրաշեն, Հրեշտակապետաց, Քամոյան, Խոջիվանքի եկեղեցիները և այլն:

Ինչպես տեսանք, հայկական ճարտարապետությունը հազարամյակներ շարունակ ամենասուրտ կիրպով կապված է եղել հայ ժողովրդի պատմության

հետ, նրա զարգացման վրա էական ազդեցություն են ունեցել աշխարհագրական գործոնը, գաղափարական հեղաշրջումները, դեմոգրաֆիկ փոփոխությունները: Հայ ժողովրդի արտադաշտների հետ նրա ճարտարապետությունը տարածվել է տասնյակ երկրներում, որովհետև հաստատվելով այդ հողում, հայերը առաջին իսկ օրից ձեռնամուխ են եղել եկեղեցի և դպրոց հիմնելուն: Նրանք աշխատել են պահպանել իրենց արվեստի և ճարտարապետության ավանդական ձևերը որպես ազգային խորհրդանիշներ, որպես ազգապահպանման կարևոր միջոցներ:

АРМЯНСКАЯ АРХИТЕКТУРА И ИСТОРИКО-ГЕОГРАФИЧЕСКИЕ И ДЕМОГРАФИЧЕСКИЕ ФАКТОРЫ

М. М. АСРАТЯН

Р е з ю м е

Армянское нагорье с древнейших времен является связующим звеном между Востоком и Западом, что способствовало приобщению армянского народа к культуре эллинистического, а в последующем—христианского мира. Армянское зодчество развивалось в тесной связи с архитектурой соседних стран, что обуславливало их взаимовлияние и взаимообогащение.

ARMENIAN ARCHITECTURE AND HISTORICO-GEOGRAPHICAL AND DEMOGRAPHICAL FACTORS

M. M. HASRATIAN

S u m m a r y

Since the ancient times, the Armenian Plateau has served as a link between the East and the West which has facilitated interaction of the Armenian people with the hellenistic culture and later with the Christian world. The Armenian architecture has developed in close connection with the architecture of the neighbouring countries which resulted in mutual influence and enrichment.